

19 AUG 2000

Mahathir-Mozambique/I

MAHATHIR BERLEPAS KE MOZAMBIQUE UNTUK DIALOG SAID 2000

KUALA LUMPUR, 19 Ogos (Bernama) -- Perdana Menteri Datuk Seri Dr Mahathir Mohamad hari ini berlepas ke Mozambique untuk menghadiri Dialog Antarabangsa Selatan Afrika (SAID) selama empat hari mulai esok.

Yang berada di Lapangan terbang Sultan Abdul Aziz Shah di Subang dekat sini untuk mengucapkan selamat jalan ialah Timbalan Perdana Menteri Datuk Seri Abdullah Ahmad Badawi, beberapa menteri kabinet dan pemimpin Barisan Nasional.

Anggota Dewan Undangan Negeri Sungai Panjang, Dr Mohamed Khir Toyo yang semalam dilantik sebagai Menteri Besar Selangor yang baru, turut menemui Dr Mahathir di lapangan terbang itu sebelum Perdana Menteri berlepas.

Jet eksekutif kerajaan yang membawa Dr Mahathir dan isteri, Datin Seri Dr Siti Hasmah Mohd Ali ke Maputo, ibu negara Mozambique, berlepas pada kira-kira pukul 9 pagi.

Dialog tahun ini bertema "Rakan Kongsi Bijak 2000: Trend Global Dalam Ekonomi Baru Muncul".

Bekas jajanan Portugis yang mempunyai bilangan penduduk yang dianggarkan seramai 19 juta sedang pulih daripada banjir teruk. Negara itu memperolehi kemerdekaan dari Lisbon pada Jun 1975.

SAID adalah hasil sampingan acara tahunan Dialog Antarabangsa Langkawi (LID). Dialog seumpama itu mengetengahkan pentingnya konsep perkongsian bijak bagi membawa lebih banyak kemajuan dan pembangunan kepada negara-negara membangun.

Abdullah berkata lawatan Dr Mahathir itu adalah lawatan biasa yang dilakukan Perdana Menteri ke Afrika pada setiap tahun.

Katanya Dr Mahathir dijangka menjelaskan kepada para pemimpin negara Afrika pengalamannya membawa keluar Malaysia daripada krisis kewangan serta memperkukuhkan ekonomi negara.

-- BERNAMA

MAM HS AZZ LAT